

Wam Juãw **Juãw kot Jejus kôt hkwýjê hwýr** **kagà nê mẽnh**

Juãw na pre kagàja nhípêx. Na pre kagà hkwý nhípêx rax nê. Na pre mãânêñ Juãw kot tanhmã Jejus kot amnhĩ nhípêx to ho pa ã kagà nê Apokarip nê Sikũn Juãw nê Hapuhã Juãw nhũm pre ja piitã Tĩrtũm nhỹ hã hã kagà.

Juãwja Jejus nhỹ hã hkrajê jahkre ho mẽ pa xwýnhjê hõ na pre. Nê kêp Xiakre htõ na pre. Tã ra hpigêt tỳx nê kagàja nhípêx. Uràk nê mẽ kot Tĩrtũm kôt amnhĩ xunhwýr xwýnhjê mã hipêx. Mẽ kot kamã harênh nê mar nê kãm axpên kĩnh o pa kaxyw. Nê mẽ kot amnhĩ tomnuj ã amnhĩ pumunh kôt tanhmã amnhĩ nhípêx to hã mẽ kãm karõ nê hã kagà. ã na pre Juãw mẽ kãm mẽmoj jarênh nê hã kagà anê nê mẽ hwýr kumê. Nê mẽ kãm:

*Jejus kêp Tĩrtũm kapêr o amnhĩrit xwýnh ã harênh
Juãw 1.1-4; Eprêw 1.1-4*

¹ Pa ixpyrà nê mẽ ate Jejus kôt amnhĩ xunhwýr xwýnhjaja? Xà mẽ amex? E ot pa mẽ amã kagàja nhípêx nê mẽ awýr kumê. Ixte mẽ amã Tĩrtũm kapêr o amnhĩrit xwýnh jarênh kaxyw. Amnepê mã kormã mẽmoj amrakati ri nhũm pre ra rãhã ri pa ho pa. ãm kukwak ri pix mã na pu htem Tĩrtũm mẽ wa kuri pahtĩr tũm nê papa ho papa mã xwýnh. Tã ý hã mẽ ixte kapêr o mẽ ajahkre ho ri mẽ ixpa xwýnhjaja na pa prem ixpiitã kormã

akupỹm kaxkwa hwỳr àpir kêt ri inhno ho omunh o ri hkôt ixpa. Nẽ mẽ ijamak o kapër mar o ri hkôt ixpa. Nẽ mẽ inhĩkra ho hkupênh o ri hkôt ixpa.

² Na pre kaxkwa kamã Hipêêxà hkôt ri pa ho pa htã amnẽ pika hwỳr mẽ pahwỳr wrỳ. Hãmri nẽ jar mẽ pakamã kato pa pre mẽ ixkwýjaja omu. Tã mẽ ixte omunh xà hkôt na pa htem amnhĩ xô ri tanhmã mẽ amã harênh to. Koja nhỹrmã akupỹm mẽ pahto mẽ pahtĩr pu mẽ kuri pahtĩr tũm nẽ pamex nẽ papa ho papa.

³ Na pa prem tanhmã kapër to hã mar o ri hkôt ixpa. Nẽ kot tanhmã mẽ kãm amnhĩ nhĩpêx to hã omunh o ri hkôt ixpa. Ta kagàja kamã amnhĩ xô ri ixprĩ hã mẽ amã harẽ nẽ hã kagà. Mẽ ate ixpyrà nẽ aprĩ hã kot tanhmã amnhĩ nhĩpêx to ho pa hã harênh mar kaxyw. Jao mẽ pahpiitã te ixkre tipxi kamã mẽ papa pyrãk o amnhĩ nhĩpêx o papa nẽ axpên kôt pajamaxpër o ri papa. Jao Mẽpanhĩpêxà Maati mẽ Kra Jesus Kris wa hkôt amnhĩ nhĩpêx mex o ri papa.

⁴ Tã pa mẽ amã kagàja nhĩpêx nẽ mẽ awỳr kumẽ. Mẽ ate kamã harênh nẽ mar hãmri nẽ mẽ ixpyrà nẽ ajamakêtkati nẽ akĩnh nẽ ri apa kaxyw.

Tĩrtũm mex o mex ã harênh

Juāw 8.12; Epes 5.3-21; Wam Tesarõn 5.5; Eprêw 4.14-16, 9.11-14

⁵ Nẽ Jesus kot tanhmã mẽ inhmã Tĩrtũm jarênh toja kot paj amnhĩ xô ri mẽ amã hã kagà. Nà Tĩrtũm kot amnhĩ nhĩpêxja mex o mex. Aa kot tanhmã amnhĩ tomnuj to hkêt. Mex o mex jakamã na hte tanhmã mẽ kot amnhĩ tomnuj to mã amnhĩ

jagjênh kêt. Ām kot amnhĩ to mex o kot amnhĩ to mex rāhã nẽ pa ho pa xwỳnh na.

⁶ Kot mẽ pahte amnhĩ tomnuj kêt ã mẽ pamã karõ jakamã kot puj mẽ pahpê hkra hã amnhĩ jarênh tã amnhĩ tomnuj pix o ri papa nẽ ãm pahpê hkra hã amnhĩ jarênh kaprỳ nẽ amnhĩ to paxêx. Tĩrtũm krajaja na htem amnhĩ tomnuj o pa hkêt nẽ.

⁷ Nom kot puj mẽ hkôt amnhĩ nhĩpêx nẽ urak nẽ tãm ri amnhĩ nhĩpêx o papa. Nẽ kapêr kôt ri amnhĩ nhĩpêx. Hãmri nẽ te ixkre tipxi kamã ri Tĩrtũm mẽ Kra Jejus Kris wa hkôt axpên to papa pyrak o amnhĩ nhĩpêx. Na pre Jejus mẽ panê ty nẽ hkamrô axkapĩ. Jao mẽ pahte hkôt amnhĩ xunhwỳr xwỳnhjaja mẽ panê mẽ pahte amnhĩ tomnuj piitã hpãnhã amnhĩrer pa. Jakamã ãm kukwak ri pix mã na pu htem tãm amnhĩ nhĩpêx o ri papa.

Mẽ pahpiitã mẽ pahte amnhĩ tomnuj xwỳnh ã mẽ pajarênh

⁸ Nẽ mẽ pahte tōhã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarê hãmri nẽ ã amnhĩ jarênh anhỹr o paxêx. Tĩrtũm kot mẽ pahpiitã mẽ pahte amnhĩ tomnuj ã mẽ pahpumunh xwỳnh kênã.

Mẽ pahte amnhĩ tomnuj nẽ tanhmã amnhĩ nhĩpêx to hã mẽ pamã karõ

Xiakre 4.9-10

⁹ Nẽ mẽ pahpê Tĩrtũm krajaja na pu htem tanhmã amnhĩ tomnuj to hãmri nẽ tee ri ja hã amnhĩ pumu nẽ pahkaprĩ nẽ. Nẽ tokyx amnhĩ to Tĩrtũm wỳ. Hãmri nhũm mẽ pama nẽ Jejus kukwak ri tanhmã hã mẽ pahto hkêt nẽ. Ām

amnhĩ katut kôt tanhmã mẽ pahte amnhĩ tomnuj tota rě nẽ axte kãm hamaxpêr kêt nẽ. Ra kot mẽ pahtã amnhĩ jarěnh xà hkôt. Na hte Tĩrtũm amnhĩ jarěnh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rěnh par ã amnhĩ jarěnh jakamã na pre ã mẽ panhĩpêx anẽ. Na hte mẽmoj tã tanhmã amnhĩ jarěnh to hãmri nhũm apkati nhũm ihkjê ho kumẽ nẽ axtem tanhmã mẽmoj jarěnh to hkêt nẽ.

¹⁰ Ra kot mẽ pahpiitã mẽ pahte amnhĩ tomnuj xwýnh ã mẽ pajarěnh jakamã kot puj mẽ pahtõ ã mẽ pajarěnh anhỹrja ma nẽ hkôt pajamaxpêr kêt japêr. Rỳ kuma nẽ ãm kuma nẽ pajamaxpêr o:

—Nà ixte tanhmã amnhĩ tomnuj tore hã.

Anhỹr o amnhĩ jarẽ. Hãmri nẽ te ate Tĩrtũm hêx xwýnh ã harěnh pyræk. Jao amã kapêr mar prãm kêt ã amnhĩ to amnhĩrĩt.

2

Jejus kêp mẽ paxyr pê Tĩrtũm mã kapêr xwýnh ã harěnh

Wam Ximotre 2.5; Eprêw 9.11-14

¹⁻² E mẽ ate amnhĩ tomnuj o apa hkêt kaxyw na pa ã mẽ amã ixkapêr nẽ hã kagà anẽ. Mẽ ate kamã harěnh nẽ mar hãmri nẽ tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nẽ te kêp mẽ paxyr pê Tĩrtũm mã kapêr xwýnh pyræk o amnhĩ nhĩpêx. Mẽ pakurom aa kot amnhĩ tomnuj kêt jakamã na hte mẽ paxyr pê

Tĩrtũm mã kapēr nhũm kuma. Hāmri nē kukwak ri pix mã mẽ pahte tanhmã amnhĩ tomnuj to piitã amnhĩ katut kôt rēnh pa nē axte kãm hamaxpēr kêt nē.

Tĩrtũm krajaja kot Tĩrtũm kôt amnhĩ nhĩpêx ã mẽ kãm karõ

³ Nē na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nē.

⁴ Nom koja mēhõ kēp hkra hã amnhĩ jarēnh tã hkôt amnhĩ nhĩpêx kêt nē ãm kēp hkra hã amnhĩ to hêx.

⁵ Na htem Tĩrtũm kapēr kôt amnhĩ nhĩpêx o pa pē kãm hkĩnh tỳx ã amnhĩ to amnhĩrīt. Nē kēp hkra hã amnhĩ to amnhĩrīt mex o pa.

⁶ Jakamã kêr ka mẽ apê Jejus Kris kwỳ hã amnhĩ jarēnh xwỳnhjaja hkôt pix mã amnhĩ nhĩpêx mex o ri apa.

*Mẽ pamã axpēn kĩnh ã mẽ pamã karõ
Juāw 13.34-35; Wam Juāw 3.14-18*

⁷ E Kris kôt ixkràmnhwỳjaja. Inhmã mẽ akĩnh jakamã na pa ã mẽ amã mẽmoj jarēnh nē hã kagà anē. Kot paj mẽ amã mẽmoj nyw jarēnh kêt nē. Ra mẽ ate mẽmoj mar xwỳnhhta kot paj axte mẽ amã harē. Mẽ pamã axpēn kĩnh nē tãm axpēn nhĩpêx o papa hã Tĩrtũm kot mẽ pamã karõta. Ra mẽ ate mar tã kot paj axte mẽ amã harē nē hã kagà.

⁸ Wam Tĩrtũm kot mẽ pamã axpēn kĩnh ã mẽ pamã karõja kormã Jejus kot mẽ panê htyk hkêt ri kot mẽ pamã hã karõta na. Tã ra Jejus kãm mẽ pajapê xàj mẽ panê htyk jakamã na pa axte ã mẽ ate axpēn nhĩpêx anhỳr o apa hã mẽ amã karõ nē

hã kagà. Mě ate Kris pyrà nē amã axpēn kīnh xàj tanhmã axpēn kutã anojarēt to ho ri apa kaxyw. Nom kormã mẽ pahte Jejus kôt amnhĩ xunhwÿr kêt ri na pu prem ã axpēn nhĩpêx anhÿr kêt nē. Tã hkôt amnhĩ xunhwÿ hãmri nē ã axpēn to mex o papa anē.

⁹⁻¹¹ Tã koja mēhõ kot Jejus kôt amnhĩ nhĩpêx ã amnhĩ jarēnh tã kãm hkwÿjê hkīnh kãm àmnhĩx ri mẽ kutã nojarēt o pa hkêt nē. Hãmri nē kot Jejus kôt amnhĩ nhĩpêx ã amnhĩ jarēnh ã amnhĩ to hêx. Jao te htÿx ri kamàt kô kamã pa pyræk. No koja mēhõ kãm hkwÿjê hkīnh kãm mẽ kutã nojarēt o pa nē mãânēn Jejus kôt amnhĩ nhĩpêx mex o pa. Jao te hirã kamã ri pa pyræk. Jakamã tanhmã hkwÿjê homnuj to ho pa hkêt nē mẽ piitã mẽ ho mex o axpēn pyræk o pa.

Juāw kot mẽ piitã ahpÿnhã tanhmã mẽ kãm kapër to

¹²⁻¹⁴ E kot pa ahpÿnhã tanhmã mẽ amã ixkapër to nē hã kagà. Mě apiitã te mẽ apê ixkra pyræk. Na ka prem Jejus kôt amnhĩ xunhwÿ nhũm Tĩrtũm ja hã mẽ apumu nē Kra kukwak ri mẽ ate amnhĩ tomnuj piitã amnhĩ katut kôt rēnh pa nē axte kãm hamaxpër kêt nē. Jakamã ra mẽ ate Tĩrtũm kēp Mēpanhĩpêxà Maati hã omunh mex.

Nē mẽ ate Jejus kôt amnhĩ xunhwÿr ã amgrà xohtô xwÿnhjaja. Amnepēm amrakati ri Jejus ra rãhã ri pa ho pa xwÿnhjaja kôt mẽ ate amnhĩ xunhwÿr xwÿnhjaja kot paj mẽ amã tanhmã ixkapër to nē hã kagà.

Nē mẽ akwÿjaja ham Jejus kôt mẽ ate amnhĩ xunhwÿr xwÿnhjaja ra mẽ ate Tĩrtũm kapër mã

ajamxpēr rāhã ho ri apa. Jakamã na hte Satanasti mẽ ate amnhĩ tomnuj prãm xàj tee ri tanhmã mẽ akrã hto ka mẽ Jejus nhỹ hã kutã amnhĩ to htỳx pẽ hkôt amnhĩ nhĩpêx kêt nẽ.

Mẽ kot amnhĩ tomnuj xwỳnhjaja tanhmã kot amnhĩ nhĩpêx to

Matêwre 6.24; Eprêw 11.24-26; Xiakre 4.4

¹⁵ Nẽ kêt ka mẽ amã Tĩrtũm kôt amnhĩ nhĩpêx prãm xàj mẽ kot amnhĩ tomnuj xwỳnhjê hkôt amnhĩ nhĩpêx kêt nẽ. Nẽ mẽ hamaxpēr punuj xwỳnhjê hkôt ri amnhĩ nhĩpêx kêt nẽ. Kot kaj mẽ hkôt amnhĩ nhĩpêx hãmri nẽ amã Tĩrtũm kĩnh kêt ã amnhĩ to amnhĩrĩt.

¹⁶ Mẽ kot amnhĩ tomnuj xwỳnhjaja na htem mẽmoj punuj mã hamaxpēr nẽ hkôt tanhmã amnhĩ tomnuj to. Nẽ mẽmoj pumu nẽ ra kãm ho õ hprãm nom Tĩrtũm pẽ ja omnuj ã hkamnhĩx kêt nẽ. Rỳ tanhmã mẽhõ kot amnhĩ tomnuj to hã omu nẽ hkôt kãm amnhĩ nhĩpêx prãm. Nẽ tanhmã amnhĩ to jarkrar to ho ri pa. Á na hte mẽ kot amnhĩ tomnuj xwỳnhjaja amnhĩ nhĩpêx anhỹr o pa. Mẽ kot amnhĩ nhĩpêxja Mẽpanhĩpêxà Tĩrtũm kãm hprãm kêt.

¹⁷ Koja nhỹrmã mẽ kot tanhmã amnhĩ tomnuj toja piitã hapêx pa. Nẽ mẽ hamaxpēr punujja mããnẽn nhỹrmã hapêx pa. Nẽ mẽ kot amnhĩ tomnuj o mẽ pa xwỳnhjaja koja mẽ amnhĩ xà htỳx kamã hamak rāhã ho pa ho pa. No Tĩrtũm kôt mẽ kot amnhĩ nhĩpêx o mẽ pa xwỳnhjaja koja mẽ kurom kuri htĩr tũm nẽ mex nẽ hkĩnh nẽ pa ho pa.

Kãm Kris kurê xwỳnh maati jarẽnh

Wam Juāw 4.1-6; Sikũn Juāw 7-11

18 E Kris kôt ixkwỳjaja. Kris akupỳn mẽ pahwỳr wrỳk kukamã koja mẽmoj tanhmã amnhĩ nhĩpêx to. Na pre ra Kris kôt mẽ panhĩõja mẽ pamã ã harēnh anē nē harēnh o:

—Koja mẽ panhõ Pahihti Kris akupỳn mẽ pahwỳr wrỳk kaxyw hāmri nhũm kêp Kris ã amnhĩ to hêx xwỳnh maati kumrêx nhỹhỹnh kato. Hāmri nē hêx rom te Kris pyrà nē tanhmã mẽ kãm kapêr to nē tanhmã mẽ hipêx to ho pa nhũm rĩ kormã Kris akupỳn mẽ pahwỳr wrỳ. Anē.

Na pre hkukamã ã harēnh anē ka mẽ harēnh ma. Tã ra mẽ kêp Kris ã amnhĩ to hêx xwỳnhjaja ohtô nē mra nē kãm hkurê xwỳnh maatita kukamã tanhmã amnhĩ nhĩpêx to pē mẽ kãm amnhĩ to hêx o pa. Jakamã na pa ixprĩ hã mẽ amã tanhmã mẽ harēnh to. Koja tokyx kêp Kris ã amnhĩ to hêx xwỳnh maatita nhỹhỹnh mẽ pahwỳr kato.

19 Na pre hkwỳjaja mẽ pahpê Kris kwỳjê hkôt ri pa htã mẽ pahkĩnhã kêp Kris kwỳ hkêt. Kêp hkwỳ ronhỹx arĩ mẽ pahkôt Kris kôt amnhĩ nhĩpêx o pa. Nom axtem nē àhpumunh tỳx pyrà nē mẽ pahkaga nē htỳx tanhmã amnhĩ tomnuj to ho pa. Jao kêp Jejus kwỳ hkêt ã amnhĩ to amnhĩrĩt.

20 No kêt mẽ pahpê Tĩrtũm krajaja na pre Jejus mẽ pahwỳr Karõ rē nhũm mẽ pahkarõ mã agjê nē mẽ pahkrãm kapêr mex jagjê. Jakamã na pu mẽ mẽ kêp Kris kwỳ hkêt xwỳnhjê rom Tĩrtũm kapêr mar mex nē.

21 Xà mẽ ate Tĩrtũm kapêr ã kagà pumunh kêt kôt na pa ã mẽ amã ixkapêr nē hã kagà anē? Nà ra mẽ ate omunh nē mar mex kênã. Tã mẽ ate mẽ kot tanhmã Jejus o hêx to xwỳnhjê pumunh mex nē mẽ harēnh mar mex kaxyw na pa ã mẽ awỳr kagà

nhĩpêx nê mēnh anê. Kêr kê mē mẽmo arĩgro hã mē awỳr agjê nê tanhmã mē amã Jejus o hêx to ka mē aprĩ hã mē omunh mex kurê kumrêx.

²² Tanhmã na htem Jejus o hêx to? E kot paj ixprĩ hã mē amã tanhmã mē harēnh to ka mē inhma. Nà koja mẽhõ mē amã tanhmã harēnh to nê harēnh o:

—Nà Jejus kêp Tĩrtũm Kra hkêr. Tĩrtũm kot mē pahwỳr mẽnh kêr tã ka htem atỳx kapêr kôt ri amnhĩ nhĩpêx o ri apa. Kwa kêr mē ixkapêr kôt mãn ri amnhĩ nhĩpêx o ri apa.

Anhỳr o mē amã kapêr ka mē ama nê kãm Kris mē Tĩrtũm wa hkĩnh kêr xwỳnh ã omunh kurê kumrêx.

²³ Koja mẽhõ Tĩrtũm Kra Jejus kaga nê mãănēn Hipêêxà kaga. No koja mẽhõ Tĩrtũm Kra hkôt amnhĩ xàm nê mãănēn Hipêêxà hkôt amnhĩ xãm.

Mẽ pahte Kris kaga pymaj tanhmã amnhĩ nhĩpêx to hã mẽ pamã karõ

²⁴ Amnepêr mē ate Jejus kôt amnhĩ xunhwỳrta ã na ka prem kêp Tĩrtũm Kra hã Tĩrtũm kot mē pahwỳr mẽnh xwỳnh ã harēnh ma. Tã kêr ka mē arĩ amnhĩ kaxyw hkôt ajamaxpêr nê hkôt pix mã amnhĩ nhĩpêx o ri apa. Kot kaj mē anê nê Mēpanhĩpêêxà Maati mē Kra wa hkôt amnhĩ nhĩpêx mex o apa rãhã ty.

²⁵ Hãmri nê wa kuri atĩr tũm nê amex kumrêx nê apa ho apa. Ra Jejus kot ja jarēnh xà hkôt.

²⁶ Na pa ã mē amã ixkapêr nê hã kaga anê. Mẽ aprĩ hã mē amã Jejus o hêx xwỳnhjê kapêr mar nê mē kot mē amã hêx kôt mē omunh mex kaxyw.

²⁷ Tĩrtũm Karõ na pre mē akarõ mã gjêx pa nê mẽ amã Tĩrtũm kapêr piitã o amnhĩrĩt mex o mẽ akôt pa. Jakamã mẽmo kaxyw kot kaj mē Tĩrtũm kapêr

o hêx xwÿnhjaja kot tanhmã harênh toja ma? Ra Tirtûm Karõ kot mẽ amã ho amnhĩrĩt o mẽ ajahkre mex o pa kênã kot ka kêt mẽ nhãm mẽ kapêr ma. Na hte Tirtûm Karõja mẽ urà nê Tirtûm kapêr ho hêx kêt nê. ãm katàt kôt kot ho amnhĩrĩt mex jakamã kwa kêt ka mẽ mar tÿx nê hkôt ri amnhĩ nhĩpêx mex rãhã ho ri apa.

*Mẽ pahte tãm ri amnhĩ nhĩpêx ã mẽ pamã karõ
Juāw 14.25-26, 15.1-8*

²⁸ E Jejus kôt ixkrajaja. Kêr ka mẽ arĩ Kris kôt amnhĩ nhĩpêx mex rãhã ho ri apa. Kê nhÿrmã akupÿn mẽ pahwÿr wrÿk o tẽ ka mẽ amnhĩ wÿr omu nê akĩnh nê. Nê akĩnh kãm axàmnhĩx kutã mra nê hkaxpa nê amnhĩ kamã amã uma hkêt nê. Rÿ mẽmoj tã amnhĩ tã apijaàm kêt nê. ãm axàmnhĩx akĩnh nê ma kutã mra.

²⁹ Krisja mex o mex jakamã na pu htem uràk nê amnhĩ to mex o ri papa. Mẽ pahte amnhĩ to mex o papa xwÿnhjaja uràk nê mẽ pahpê Tirtûm kra na pu mẽ.

3

*Tirtûm krajê hkukamã tanhmã mẽ harênh to
Rômãn 8.18; Sikûn Korõt 3.18; Sikûn Pêtre 3.11-14*

¹ Nê Mẽpanhĩpêêxà Maati kãm mẽ pajapê htÿx kumrêx jakamã na pre mẽ pahte hkôt amnhĩ xunhwÿr ã mẽ pahpumunh kôt mẽ pahpê hkra hã mẽ pajarê pu mẽ pahpê hkra nê ri papa. Ja na mẽ pamã mex o mex. Nom mẽ kot hkôt amnhĩ xunhwÿr kêt xwÿnhjaja kot hprĩ hã ja hã mẽ pahpumunh kêt jakamã na htem mẽ pahte tãm amnhĩ nhĩpêx ã mẽ pahpumu nê tee ri hamaxpêr.

² E Kris kôt ixkwỳjaja. Ra mẽ pahpê Tĩrtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kêt. Koja nhỹrmã Jejus akupỹn mẽ pahwỳr wrỳ pu mẽ pano ho tanhmã kute hã omunh mex nẽ. Hãmri nẽ tã te kot amnhĩ nhĩpêx pyrãk o amnhĩ nhĩpêx mex o papa. Ra mẽ pahte ja mar mex.

³ ã mẽ pahte amnhĩ kukamã pajamaxpêr anhỹr o papa xwỳnhjaja na pu htem kormã amnhĩ wỳr Jejus kamã pajamak o papa. Pê urãk nẽ mẽmoj punuj mã pajamaxpêr kêt o papa. Nẽ urãk nẽ tanhmã amnhĩ tomnuj to hkêt nẽ.

Tĩrtũm krajaja kot amnhĩ tomnuj o pa hkêt ã mẽ kãm karõ

⁴ Nẽ mẽ kot amnhĩ tomnuj o mẽ pa xwỳnhjaja na htem Tĩrtũm kapêr kwỳm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nẽ mẽ urãk nẽ kapêr kwỳm ri amnhĩ nhĩpêx.

⁵ No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwỳr wrỳ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarẽnh mar mex.

⁶ Jakamã mẽ pahpê hkwỳjaja na pu htem ri pahỳx tanhmã amnhĩ tomnuj to ho papa hkêt nẽ. ã mẽ kot amnhĩ nhĩpêx anhỹr xwỳnhjaja kêp hkwỳ hkêt.

⁷ Nom koja mẽhõ Kris pyrã nẽ tãm amnhĩ nhĩpêx o pa hãmri nẽ kêp Tĩrtũm kraa. Jakamã kwa koja mẽhõ Tĩrtũm kapêr kwỳm ri tanhmã mẽ amã kapêr to ka mẽ ama nẽ ãm ama.

⁸ Mẽ kot amnhĩ tomnuj o mẽ pa xwỳnhjaja na htem Satanasti hkôt ã amnhĩ nhĩpêx anhỹr o pa. Satanastija Tĩrtũm kot mẽmoj to kator krax rũm

nhũm ã kot amnhĩ tomnuj anhỹr o pa xwỳnh na. Tã ã kot amnhĩ nhĩpêx anhỹr o paja o hapêx par kaxyw na pre Tĩrtũm Kra Jejusja amnẽ pika hwỳr wrỳ.

⁹ Nom mẽ papajaja mẽ pahpê Tĩrtũm kra na pu mẽ. Na pre mẽ pahwỳr amnhĩ Karõ rẽ nhũm mẽ pahkarõ mã gjêx pa nẽ mẽ pahkõt pa ho pa. Jakamã tanhmã kot puj wem amnhĩ to nẽ Satanasti pyrã nẽ pahtỳx ri amnhĩ tomnuj o papa? Nà kot puj mẽ ã amnhĩ nhĩpêx anhỹr kêt nẽ.

¹⁰ Koja mẽhõ tãm amnhĩ nhĩpêx kêt nẽ hãmri nẽ mããnẽn hkwyjê kamã ukapri hkêt nẽ. Hãmri nẽ ã amnhĩ nhĩpêx anhỹr o kêp Tĩrtũm kra hkêt ã amnhĩ to amnhĩrit. ãm kêp Satanasti hkra hã amnhĩ to amnhĩrit kurê kumrêx.

Mẽ pamã axpẽn kĩnh o te Jejus kãm mẽ pahkĩnh pyrãk ã mẽ pamã karõ

Matêwre 22.39; Rukre 10.25-37; Juāw 13.31-35

¹¹ Nẽ kêt ka mẽ arĩ amã axpẽn kĩnh pê tãm axpẽn nhĩpêx o ri apa rãhã nẽ. Te amnepê mã mẽ ate Jejus kõt amnhĩ xunhwỳr ã arĩgrota ã mẽ kot mẽ amã ja hã karõ pyrã nẽ.

¹² No mẽ ri finat Kaĩ kot amnhĩ nhĩpêx pyrãk o amnhĩ nhĩpêx kêt nẽ. Kêp Satanasti hkra jakamã na pre htõja pĩ. Kurom kot tãm amnhĩ nhĩpêx ã omu nẽ kamã gryk nẽ kupĩ.

¹³ Tã koja mẽ kêp Tĩrtũm kra hkêt xwỳnhjaja Kaĩ pyrã nẽ kêp mẽ aprãm nõkati nom kêt ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ.

¹⁴ Kormã mẽ pahte Jejus kõt amnhĩ xunhwỳr kêt ri na pu prem mẽ urãk nẽ amnhĩ tomnuj o

papa. Jao mẽ pahpê kuwy hwỳr papa mã xwỳnh. Tã mẽ pahte Jejus kôt amnhĩ xunhwỳr jakamã ra pahpê Tĩrtũm mẽ Kra wa kuri pahtĩr tũm nẽ papa mã xwỳnh. Jakamã na pu htem mẽ kêp hkra hkêt xwỳnhjê kurom pamã mẽ piitã mẽ hkĩnh o tanhmã mẽ ho mex to ho papa. Mẽ kãm amnhĩ kwỳjê hkĩnh kêt xwỳnhjaja arĩ mẽ kêp kuwy hwỳr mẽ pa mã xwỳnh na mẽ. Ra mẽ pahte ja jarẽnh mar mex.

¹⁵ Mẽ kãm mẽ hpar prãm o mẽ pa xwỳnhjaja koja nhỹrmã Tĩrtũm mẽ Kra wa kuri htĩr tũm nẽ pa ho pa hkêt nẽ. Ra mẽ pahte mããnẽn ja mar mex. Jakamã kwa mẽ amã akwỳjê hprãm nõkati ho ri mẽ apa xwỳnhjaja. Tĩrtũm noo mã te ra mẽ ate mẽ hpar pyræk jakamã kot kaj mẽ arĩ ã amnhĩ nhĩpêx anhỹr o ri apa hãmri nẽ nhỹrmã Tĩrtũm nhõ krĩ hwỳr axàpir kêt nẽ.

¹⁶⁻¹⁸ E ixkwỳjaja. Kwa kêr pu mẽ pajakwa pix o pamã axpẽn kĩnh ã amnhĩ jarẽnh kêt nẽ. Mããnẽn axpẽn kutã panojarêt o ri papa. Nẽ tanhmã axpẽn to mex to. Tanhmã na pre Jejus kãm mẽ pajapê hã amnhĩ nhĩpêx to? Nà na pre kãm mẽ pamex prãm xàj mẽ panê ty. Kãm amnhĩ tã ma hkêt kãm mẽ pakamã ukapĩrĩ xàj mẽ panê ty. Tã kêr pu mẽ uræk nẽ pahkwỳjê kamã paxukapĩrĩ ho mẽ kutã panojarêt rãhã ho papa. Jao mẽ paxàpkur xà hã panhõ pumu nẽ nhỹri pahkwỳjê hõ pumu nhũm kêp amrakati. Pu mẽ tee ri ja hã omu hãmri nẽ kãm mẽ panhõta kwỳ gõ. Kot pu mẽ ã amnhĩ nhĩpêx anhỹr kêt nẽ hãmri nẽ pamã Tĩrtũm kĩnh ã amnhĩ jarẽnh kaprỹ.

¹⁹ Nẽ kot puj mẽ ã axpẽn to mex o papa anẽ nẽ ra pahte Tĩrtũm kôt amnhĩ nhĩpêx mex ã amnhĩ

to amnhĩrīt. Hāmri nē ra paxàmnhĩx kām tanhmã amnhĩ jarēnh to ho papa. Amnhĩ kamã pamã uma hkêt nē paxàmnhĩx pajamakêtkati nē kām tanhmã amnhĩ jarēnh to.

Mē paxàmnhĩx amnhĩ to Tĩrtũm wỳr ã mē pamã karõ

²⁰ Nē kot puj mē mẽmo arĩgro hã tanhmã amnhĩ tomnuj to hāmri nē tee ri ja hã amnhĩ pumu nē amnhĩ kamã pagryk nē. Na hte Tĩrtũm tanhmã mē pahte amnhĩ tomnuj to hã mē pahpumu nom arĩ kām mẽ pajapêê. Mē parom àhpumunh o àhpumunh jakamã kot mẽ pahte amnhĩ tomnuj prãm kêt ã mẽ pahpumunh mex.

²¹ Jakamã puj mẽ ã kām pajamaxpēr anē nē amnhĩ kamã pamã uma hkêt kām paxàmnhĩx tanhmã ri amnhĩ to hwỳr to ho ri papa.

²² Kot puj mẽ hkôt amnhĩ nhĩpêx o papa rãhã nē mẽmoj tã kuwỳ. Nē kām hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwỳ. Hāmri nhũm mẽ pama nē tanhmã mẽ pamã mẽmoj to rỳ mẽ pamã mẽmoj gõ.

Te ixkre pixi kamã mẽ pahtipxi pyræk ã mẽ pamã karõ

²³ Nē tanhmã mẽ pahte amnhĩ nhĩpêx to ho papa hã na hte Tĩrtũm mẽ pamã karõ? Nà mẽ pahte amnhĩ kaxyw Kra Jesus Kris kôt pajamaxpēr nē hkôt amnhĩ nhĩpêx o papa hã na hte mẽ pamã karõ. Nē kapēr xà hkôt pamã axpên kĩnh o mẽmoj to axpên kutã panojarêt o papa hã na hte mẽ pamã karõ. Na hte ã mẽ pahte amnhĩ nhĩpêx anhỳr ã mẽ pamã karõ anē.

24 Jakamã kot puj mẽ kapër xà hkôt axpën nhĩpêx o papa nẽ te ixkre tipxi kamã mẽ pahte axpën kôt Tĩrtũm kôt ri papa pyræk. Ra kot mẽ pahwỳr Karõ rēnh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrĩt.

4

Mẽ kot Kris kapër jarēnh ã amnhĩ to hêx xwỳnhjê jarēnh

Wam Korĩt 12.1-3; Wam Juãw 2.18-26; Sikũn Juãw 7-11

1-3 Nẽ koja mẽhõ Tĩrtũm kapër o mẽ ajahkre kaxyw mẽ amã tanhmã Jejus Kris jarēnh to nẽ ãm hãmri harẽ nẽ harēnh o:

—Na pre Tĩrtũm Kra Jejus mẽ pahwỳr wrỳ nẽ ĩ ho ĩ ho mẽ pakamã kato. Tĩrtũm tãm na pre mẽ pahwỳr kumẽ nhũm wrỳ.

Anhỹr o mẽ amã harẽ ka mẽ ama nẽ kapër kôt ajamaxpēr kurê kumrêx. ãm hãmri na hte Tĩrtũm Karõ nhỹ ã harēnh anẽ. No koja Jejus kêp Tĩrtũm Kra hkêt ã harẽ ka mẽ ama nẽ ãm ama nẽ hkôt ajamaxpēr kêt nẽ. Kãm Kris kurê xwỳnh maati nhỹ hã kapër xwỳnhjaja na hte ã harēnh anhỹr o pa. Na ka prem ra kãm Kris kurê xwỳnh maatiya tokyx hpôx ã harēnh ma. Tã na ra y hã kapër xwỳnhjaja ohtõ nẽ pika piitã hkôt mẽ hkôt pa nẽ te Tĩrtũm Karõ nhỹ hã mẽ kãm kapër pyræk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwỳjaja. Koja mẽhõ mẽ awỳr mra nẽ tanhmã mẽ amã Tĩrtũm kapër jarēnh to ka mẽ aprĩ hã ama nẽ rĩ kormã kêp Tĩrtũm nhỹ hã kapër jarēnh xwỳnh ã harẽ rỳ kot amnhĩ to hêx xwỳnh ã harẽ.

⁴ Kêť mẽ papajaja jajê rom mẽ pahpê Tĩrtũm kra na pu mẽ. Nê Tĩrtũm Karõ kot ra mẽ pahkarõ mã gjêx xwỳnhta hihtỳx o jajê piitã mẽ hakrenh. Jakamã na pu htem ỳ hã mẽ kutã amnhĩ to htỳx o papa nhũm mẽ tee ri tanhmã mẽ pamã Jesus o hêx to kaprỳ. Pu mẽ kuma nê ãm mẽ kuma.

⁵ Mẽ kêp Tĩrtũm kra hkêť jakamã na htem hkôt amnhĩ nhĩpêx kêt nê. Mẽ kot amnhĩ nhĩpêxja axtem na. Jakamã na htem Tĩrtũm kapêr kwỳm ri tanhmã hkra hkêť xwỳnhjê mã kapêr to ho pa nhũm mẽ kuma nê kãm mẽ mar prãm nê.

⁶ Nom mẽ ixte Tĩrtũm kapêr o mẽ ajahkre xwỳnhjaja na pa htem mẽ kurom Tĩrtũm nhỹ hã ixkatàť kôt ãm hãmri mẽ amã kapêr jarênh o ri ixpa. Jakamã ka mẽ apê hkra hã mẽ amã mẽ inhmar prãm nê. No mẽ kêp hkra hkêť xwỳnhjaja kãm mẽ inhmar prãm kêt.

Na pu htem pahprĩ hã mẽ kapêr ã mẽ kuma nê rĩ kormã tanhmã mẽ harênh to. Tĩrtũm nhỹ hã kapêr ã mẽ harê rỳ kãm hkurê xwỳnh maati nhỹ hã kapêr ã mẽ harê.

Tĩrtũm kãm mẽ pajapê hã tanhmã amnhĩ nhĩpêx to hã harênh

Juāw 3.16-21; Rõmãn 5.5-9, 8.35-37

⁷ E ixkwỳjaja. Na hte Tĩrtũm tanhmã mẽ pahpê hkrajê ho pu mẽ pamã axpên kĩnh nê. Jakamã kêr pu mẽ ã axpên nhĩpêx anhỹr jao axpên to mex pix nê. ã Tĩrtũm kot mẽ panhĩpêx anhỹr jakamã kêr pu mẽ pahpê hkrajaja ỳ hã ã axpên nhĩpêx anhỹr o ri papa.

8 Koja mēhō Tīrtūm kīnhã kām mẽ hkwyjê hkīnh kêt hāmri nē mẽ kamã ukaprī hkêt o pa. Hāmri nē kēp Tīrtūm kra hkêt ã amnhĩ to amnhĩrīt mex nē.

9-10 Tīrtūm kām mẽ pajapê htýx kumrêx. Kormã mẽ pamã hkīnh kêt ri nhũm kumrêx amnhĩ rom kām mẽ pajapê ho pa. Nē kām mẽ pajapê xàj mẽ pahwýr Kra pyxita mẽ. Mẽ pahte amnhĩ tomnuj pānhã kot mẽ panê htyk kaxyw. Mẽ pahte kukwak ri amnhĩ nhĩpêx nyw o amnhĩ nhĩpêx nē nhỹmã wa kuri pahtĩr tũm nē pamex nē papa ho papa kaxyw. Æ na pre Tīrtūm mẽ pahwýr Kra mēnh anhýr o kām mẽ pajapê hã amnhĩ to amnhĩrīt.

11 E ixkwýjaja. Tīrtūm kām mẽ pajapê htýx jakamã kwa kēr pu mẽ uràk nē pamã axpēn kīnh o papa. Nē axpēn kamã paxukaprī nē.

12 Aa mẽ pahtō pahte pano ho Tīrtūm pumunh kêt tã na hte mẽ pakamã pa ho pa. Pu mẽ kām mẽ pajapêta pyrã nē ý hã pamã axpēn kīnh o papa.

13 Na pre mẽ pahwýr Karō rē nhũm mẽ pahkarō mã agjé pu mẽ ý hã kot amnhĩ nhĩpêx o amnhĩ nhĩpêx o papa.

14 Nē mẽ ixpê Jejus nhỹ hã mẽ ajahkre xwýnhjaja. Mẽ ixte kot amnhĩ nhĩpêx nē kot mẽmoj tanhmã ho hã omunh o ri hkôt ixpa jakamã na pa htem ma mẽ piitã mẽ kām harēnh o ri mẽ hkôt ixpa. Nē mẽ kām harēnh o:

—Tīrtūm na pre mẽ pahwýr Kraja mẽ. Kot mẽ pahpiitã mẽ panê htyk kaxyw mẽ pahwýr kumē. Anē.

15 Mẽ kot Jejus kēp Tīrtūm Kra hã harēnh o pa xwýnhjaja na hte Tīrtūm mẽ kamã pa ho pa nhũm htem ý hã ã Kra jarēnh anhýr o pa.

16 Na pu mẽ ra pahprĩ hã Tĩrtũm kãm mẽ pajapê hã amnhĩ tã omu. Kãm mẽ pajapê ht̃x kumrêx ã amnhĩ tã omu. Jakamã kot puj mẽ uràk nẽ ỹ hã pamã mẽ piitã mẽ hkĩnh o papa. Tĩrtũm mẽ mẽ pahtipxi nẽ ri papa kênã.

Mẽ kãm axpẽn kĩnh xwỳnhjaja kãm Tĩrtũm puma hkêt ã mẽ harênh

17 Nẽ kot puj mẽ pamã axpẽn kĩnh o papa nẽ mǎănẽn Kris kôt amnhĩ nhĩpêx ho papa. Hãmri nhũm nhỹrmã Tĩrtũm kot Kra mẽ wa kuri mẽ htĩr tũm nẽ mẽ pa ho mẽ pa mã xwỳnhjê nhĩxi jarênh kaxyw pu mẽ tee ri amnhĩ kukamã pajamaxpêr kêt nẽ. Ra amnhĩ nhĩxi jarênh ma nẽ pahkĩnh nẽ.

18 Nẽ koja mẽhõ kãm hkwyjê hkĩnh kêt nẽ tanhmã hõ homnuj to. Hãmri nẽ kot amnhĩ tã tanhmã ho pymaj kãm uma ho hwỳr mrar kêt nẽ. No koja kãm hkwyjê hkĩnh nẽ tanhmã mẽ ho mex to ho pa nẽ kãm mẽ uma hkêt nẽ.

19 Tĩrtũm kumrêx na pre kãm mẽ pajapê nẽ mẽ pakukamã tanhmã mẽ pahto mex to. Tã pu mẽ ra amnhĩ pyrà nẽ pamã hkĩnh o papa. Nẽ pamã mẽ piitã mẽ hkĩnh o papa.

20 Nẽ koja mẽhõ kãm Tĩrtũm kĩnh ã amnhĩ jarênh tã kãm hkwyjê hõ hprãm nõkati hãmri nẽ ra kãm Tĩrtũm prãm kêt ã amnhĩ to amnhĩrĩt. Kot kaj mẽ ano ho akwyjê pumunh o apa xwỳnhhta amã hkĩnh kêê tã tanhmã kot ka we amnhĩ to nẽ ate ano ho Tĩrtũm pumunh kêêta amã hkĩnh ã amnhĩ jarê? Nà ka ã amnhĩ jarênh anhỳr o amnhĩ to axêx.

21 Na pre Tĩrtũm mẽ pamã kapêr o amnhĩrĩt o: Kot kaj mẽ amã ixkĩnh hã kot kaj mẽ mǎănẽn amã akwyjê hkĩnh o mẽ ho mex o ri apa. Anê.

5

Tĩrtũm nhỹ hã mẽ pamã axpẽn kĩnh ã mẽ pamã karõ

¹ Nẽ Tĩrtũm kot mẽ pahwỳr Jejus mẽnh ã harẽnhja. Koja mẽhõ kuma nẽ amnhĩ kaxyw hkõt hamaxpěr nẽ Jejus kõt amnhĩ xãm hã koja Tĩrtũm ja hã omu nẽ ho hkra.

Nẽ koja mẽhõ kãm Tĩrtũm kĩnh hã koja mããnẽn kãm hkwyjê hkĩnh o pa.

² Ja pyrã nẽ kot puj mẽ pamã Tĩrtũm kĩnh nẽ kapěr kõt amnhĩ nhĩpêx. Hãmri nẽ mããnẽn pamã krajê piitã mẽ hkĩnh ho papa.

³ Nẽ kot puj mẽ pamã Tĩrtũm kĩnh nẽ nhũm kapěrja mẽ pahpê hihtỳx kêt nẽ. Pu mẽ pamã Tĩrtũm kĩnh ã kapěr kõt amnhĩ nhĩpêx mex o ri papa.

⁴⁻⁵ Na pu prem amnhĩ kaxyw Tĩrtũm Kra Jejus kõt pajamaxpěr nẽ hkõt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra pu mẽ y hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nẽ.

Mẽmoj axkrunẽpxi nẽ kot Jejus kệp Tĩrtũm Kra hã ho amnhĩrĩt

Juāw 1.32-34, 3.36, 5.31, 15.26

⁶ Nẽ Jejus pix na pre Tĩrtũm mẽ pakaxyw ãm nhũm kệp Kra hã mẽ pahwỳr wrỳ. Hãmri nhũm Juāw Paxisja pyhti kamã hkrã kumrã. Kệp Tĩrtũm Kra hã hkrã kumrã. Tã nhũm Tĩrtũm kapěr kõt ma tanhmã amnhĩ nhĩpêx to ho pa. Nẽ ri hkwyjê mã kapěr jarẽnh o ri mẽ hkõt pa. Tã nhũm mẽ kupĩ nhũm kệp Tĩrtũm Kra hã pĩ kahpa hã ajêt nẽ ty nẽ hkamrõ axkapĩ. ã mẽ panê amnhĩ nhĩpêx

anē nhũm Tĩrtũm Karōja kēp Kra hã mẽ pamã ho amnhĩrĩt. Ām hãmri na hte ã tanhmã mẽmoj to amnhĩrĩt to anē. Mẽmoj to hêx kêt jakamã na pre Jejus kēp Tĩrtũm Kra hã mẽ pamã ho amnhĩrĩt.

⁷ Nē kēp Tĩrtũm Kra hã mẽ pamã mẽmoj to axkrunēpxi nē ho amnhĩrĩt.

⁸ Tĩrtũm Karō na pre kēp Kra hã mẽ pamã ho amnhĩrĩt pu prem kēp Kra hã omu. Nē Juāw Paxis kot hkrã kumrãrta ã pu mẽ mãânēn kēp Tĩrtũm Kra hã kot ho amnhĩrĩtja ã omu. Nē mãânēn kēp Tĩrtũm Kra hã pĩ kahpa hã jêt nē htyk nē hkamrô pikapĩrta ã mẽ pamã ho amnhĩrĩt pu mẽ kēp Kra hã omu. E mẽ pamã mẽmoj to axkrunēpxi nē Jejus kēp Tĩrtũm Kra hã kot ho amnhĩrĩt xwỳnh na jajaja.

⁹ Nē na pu htem jar pahkwỳjaja kot axpēn mar xà hã ixkre kamã mẽ kapēr ma nē mẽ hkôt pajamaxpēr. Tã koja Tĩrtũm tanhmã mẽ pamã mẽmoj to amnhĩrĩt to pu mẽ hkôt pajamaxpēr kurê kumrēx. Kēp Tĩrtũm kēnã kot pu kêt mẽ kapēr prã nē hkôt pajamaxpēr kêt. Tãm na pre mẽ pamã Jejus kēp Kra hã ã ho amnhĩrĩt anē.

¹⁰ Jakamã mẽ pahte Tĩrtũm Kra hkôt amnhĩ xunhwỳr xwỳnhjaja na pu prem Jejus kēp Kra hã harēnh ma nē hkôt pajamaxpēr kurê kumrēx. No mẽ kēp hkra hkêt xwỳnhjaja na htem Tĩrtũm kot kēp Kra hã harēnh ma nē ãm kuma nē amnhĩ kaxyw hkôt hamaxpēr kêt nē. Jao te Tĩrtũm kēp Hipêêxà hã amnhĩ to hêx pyrãk ã harē.

¹¹ E kot paj ixprĩ hã mẽ amã tanhmã ja jarēnh to ka mẽ inhma. Nà na pre Tĩrtũm Krata mẽ pahpiitã panê ty. Jakamã kot puj mẽ pahte hkôt amnhĩ xunhwỳr xwỳnhjaja nhỹrmã ty nhũm Tĩrtũm akupỹm

mě pahto mẽ pahtĩr. Pu mẽ wa kuri pamex nẽ pahtĩr tũm nẽ papa ho papa.

¹² Mẽ pahpê Jejus kwýjaja kot puj mẽ ã pahtĩr tũm nẽ papa anẽ. No mẽ kęp hkwý hkêt xwýnhjaja koja mẽ nhýrmã ty nẽ mẽ pahpyrà nẽ wa hwýr àpir kêt nẽ.

¹³ Na ka prem ixpyrà nẽ amnhĩ kaxyw Tĩrtũm Kra hkôt ajamaxpěr nẽ hkôt amnhĩ xunhwý. Tã pa ã mẽ amã kagàja nhĩpêx anẽ. Mẽ ate kamã harēnh nẽ mẽ pahte nhýrmã Tĩrtũm mẽ Kra wa hwýr mẽ paxàpir ã mẽ pajarēnhja mar nẽ amnhĩ kaxyw hkôt ajamaxpěr o ri apa kaxyw nẽ kapěr prār o ri apa hkêt nẽ.

Mẽ pahte paxàmnhĩx mẽmoj tã Tĩrtũm wýr ã mẽ pajarēnh

Juāw 14.13-14

¹⁴ Nẽ mẽ pahpê Tĩrtũm krajaja na pu htem paxàmnhĩx pajamakêtkati nẽ mẽmoj tã tanhmã hwýr to ho papa. Kot puj mẽ kãm hprãm xà hkôt mẽmoj tã kuwý nhũm mẽ pama.

¹⁵ Na pu htem mẽmoj tã kuwý nhũm mẽ pamar mex nẽ mẽ pahte mẽmoj tã hwýr xà hkôt tanhmã mẽ pamã mẽmoj nhõr to rý tanhmã mẽmoj to. Ra mẽ pahte ja mar mex.

Tĩrtũm kot tanhmã hkra hkêt xwýnhjê nhĩpêx to hã harēnh

Rukre 22.31-32

¹⁶⁻¹⁷ Nẽ koja Kris kôt mẽ anhĩõ tanhmã amnhĩ tomnuj to ka mẽ atõ tee ri ja hã omu nẽ ho Tĩrtũm wý. Ho awý kê nẽ tanhmã kot amnhĩ tomnuj tota o hapêx nẽ ja nẽ ho htýx kê axte ã amnhĩ nhĩpêx anhýr kêt nẽ. Kot puj mẽ pahtõ tanhmã amnhĩ

tomnuj to nhũm Tĩrtũm tee ri ja hã mẽ pahpumu nhũm ja kêp omnuj nê. Tã kot puj mẽ amnhĩ tomnujta kaga nhũm ja hã mẽ pahpumunh kôt tanhmã hã mẽ pahto hkêt nê. Âm mẽ kot amnhĩ nhĩpêx pixi koja ho hamakêtkati hkêt nê. Koja mẽhõ Tĩrtũm kaga ho hkaga nê aa hkôt amnhĩ xãm kêt nê. Hãmri nhũm tee ri amnhĩ tã omu nhũm ja kêp omnuj tỳx kumrêx. Jakamã koja aa ho hkra hkêt nê. Nê aa kot hkaga ho hamakêtkati hkêt nê pa ho pa. Jakamã koja hkaga xwỳnhta nhỹrmã ty nê kuri htĩr tũm nê pa ho pa hkêt nê.

¹⁸ Nê mẽ pahpê Tĩrtũm krajaja na pu htem amnhĩ tomnuj o papa hkêt nê. Tĩrtũm Kra Jesus kot ja pymaj mẽ panê Satanasti pumunh mex jakamã nhũm tee ri mẽ pahte tanhmã amnhĩ tomnuj to hprãm xàj mẽ pano kupyrr kaprỳ ho ri pa. Ra mẽ pahte ja mar mex.

¹⁹ Mẽ pahpê Tĩrtũm kra na pu mẽ. No mẽ kêp hkra hkêt xwỳnhjaja Satanasti kot amnhĩ tã mẽ ho htỳx pyràk o mẽ hipêx jakamã nhũm htem tanhmã amnhĩ tomnuj to ho pa. Mẽ pahte ja mar mex.

²⁰ Nê mãânên ja mẽ pahte mar mex. Na pre Tĩrtũm Kra mẽ pahwỳr wrỳ nê mẽ pamã tanhmã Tĩrtũm o amnhĩrĩt to ho pa. Tapxipix kêp Mẽpahpãm ã mẽ pamã ho amnhĩrĩt. Tã Jesus kukwak ri mẽ pahpê Tĩrtũm kra jakamã kot puj mẽ nhỹrmã wa kuri pahtĩr tũm nê pa mex nê papa ho papa.

²¹ E Kris kôt ixkwỳjaja. Kêr ka mẽ Tĩrtũm kapêr kôt pix mã mãn ri amnhĩ nhĩpêx o ri apa rãhã nê. No nhãm mẽ kot Tĩrtũm kapêr kwỳm ri mẽ amã kapêr o hêx xwỳnhjê kapêr ma nê âm mẽ ama nê mẽ hkôt amnhĩ nhĩpêx hkêt nê.

Tã ãm ja pix. Ixpê Juãw na pa krĩ piitã hkôt mẽ
amã kagà nhĩpêx nẽ kurẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f